

Orde do 11 de outubro de 2005 pola que se convoca concurso de traslados autonómico entre funcionarios do corpo de mestres.

O Real decreto 2112/1998, do 2 de outubro, establece que as administracións educativas convocarán concurso de traslados de ámbito autonómico cada dous anos de maneira coordinada, de forma que os interesados poidan participar en todas elas cun só acto, e que na resolución daqueles non se obteñan máis que un único destino nun mesmo corpo.

Celebrado o concurso correspondente ao curso 2004/2005, concurso autonómico corresponde neste curso convocar concurso de ámbito autonómico en aplicación do disposto na Lei 24/1994, do 12 de xullo, aberto ao profesorado con destino noutras comunidades autónomas, sempre que reúnan os requisitos establecidos nesta orde.

En aplicación do anterior, nesta convocatoria proveranse os postos vacantes, que no seu momento determinará esta consellería, sinalados no artigo 8 do Real decreto 895/1989, do 14 de xullo, modificado polo Real decreto 1664/1991, do 8 de novembro, así como os do primeiro ciclo de educación secundaria obrigatoria, tendo en conta o establecido na base primeira das normas comúns ás convocatorias.

Igualmente e ao abeiro do Decreto 895/1989, do 14 de xullo, convócanse os procesos previos ao concurso a fin de atender á cobertura de vacantes nos postos sinalados no seu artigo 8.

Neste concurso deberá contemplarse, igualmente, a adscrición levada a cabo ao abeiro da Orde do 15 de maio de 1996, DOG do 29, e as situacións administrativas derivadas dela.

Na súa virtude, de acordo co previsto nos reais decretos 2112/1998, do 2 de outubro, 895/1989, do 14 de xullo, e na Lei 24/1994, do 12 de xullo.

Esta consellería dispón anunciar as seguintes:
Convocatorias

Primeira.-Convocatoria para que os mestres que cesaron como consecuencia da supresión ou modificación do posto de traballo que viñan desempeñando con carácter definitivo nun centro, e os adscritos a un posto para o que non están habilitados segundo o disposto nos artigos 6 e 17 do Real decreto 895/1989, do 14 de xullo, poidan solicitar a adscrición a outro posto do mesmo centro.

Esta convocatoria faise extensiva aos mestres que no proceso de adscrición do ano 1996 quedaron adscritos con carácter forzoso nun posto de traballo dun IES en localidade distinta da de procedencia.

Segunda.-Convocatoria para que os mestres que se encontren nalgún dos supostos a que alude o artigo 18 do Real decreto 895/1989, modificado, nas súas disposicións derogatorias, polo Real decreto 2112/1998, poidan exercer o dereito a obter destino nunha localidade ou zona determinada. Poderán participar os mestres que no proceso de adscrición do ano 1996 obtiveron destino con carácter forzoso nun IES de localidade distinta á de procedencia e continúan adscritos nel. Este dereito exercerano

exclusivamente á localidade que tiñan acreditada antes do proceso de adscrición.

Terceira.-Convocatoria do concurso autonómico previsto no artigo 1 da Lei 24/1994.

Convocatoria primeira de readscrición en centro.

Convocatoria para que os mestres que cesaron como consecuencia da supresión ou modificación do posto de traballo que viñan desempeñando con carácter definitivo nun centro; os adscritos a un posto para o que non están habilitados, segundo o previsto nos artigos 6 e 17 do Real decreto 895/1989; os que como consecuencia da adscrición do ano 1996 quedaron adscritos con carácter forzoso a un IES de localidade distinta á de procedencia, poidan solicitar a adscrición a outro posto do mesmo centro. Igualmente poderán participar nesta convocatoria os mestres de educación infantil de centros transformados en institutos de educación secundaria ou centros de educación permanente de adultos, desde o centro ao que maioritariamente foron trasladados os alumnos.

Rexeranse polas seguintes bases:

I. Participantes.

Primeira.-Poden participar nesta convocatoria, tanto a vacantes como a posibles resultas, os funcionarios de carreira do corpo de mestres que se encontren nalgún dos seguintes supostos:

1. Os que perdesen o posto de traballo que viñan desempeñando con carácter definitivo ben por supresión, ben por transformación deste.

Os que en virtude da rede de centros de 1998 estando adscritos a postos de educación infantil perderon o seu posto por transformación do centro en institutos de educación secundaria ou centros de educación permanente de adultos, participarán desde o centro no que foron escolarizados os alumnos. Cando os centros receptores fosen máis dun, optarán exclusivamente por un deles.

Os que como consecuencia do proceso de adscrición do ano 1996 quedaron adscritos con carácter forzoso a un IES de localidade distinta á de procedencia.

2. Os que en virtude da adscrición convocada pola Orde do 22 de maio de 1990, DOG do 7 de xullo, na Orde do 9 de xullo de 1991, DOG do 14 de agosto e, se é o caso, Orde do 30 de marzo de 1992, DOG do 21 de abril, obtiveron un posto para o que non están habilitados conforme exixen os artigos 6 e 17 do Real decreto 895/1989, modificado polo Real decreto 2112/1998.

II. Prioridades.

Segunda.-Terán prioridade na obtención de destino os que se encontren en calquera dos supostos 1 e 2 relacionados na norma primeira da base I, conxuntamente considerados.

Terceira.-Cando existan varios mestres dentro dun mesmo suposto, a prioridade entre eles determinárase pola maior antigüidade como definitivo no centro, sen prexuízo do establecido no parágrafo anterior para os supostos 1 e 2 que se considerarán conxuntamente. Para estes efectos computárase como antigüidade no centro tamén o tempo de permanencia

en comisión de servizos, servizos especiais e outras situacións administrativas que non supuxesen perda do destino definitivo.

Os mestres que teñan o destino nun centro por desagregación ou traslado total ou parcial doutro ou transformación contarán, para efectos de antigüidade, como propietarios definitivos neste a referida ao seu centro de orixe. Igual tratamento se dará aos mestres aos que lles foi suprimido o seu destino inmediatamente anterior. Para o caso de mestres afectados por supresións consecutivas de postos de traballo, esa acumulación comprenderá os servizos prestados con carácter definitivo nos centros que sucesivamente lles foron suprimidos. Computarase en ambos os dous supostos como servizos definitivos o tempo de servizos provisionais seguintes á supresión.

Cuarta.-No caso de igualdade na antigüidade no centro decidirá o maior número de anos de servizos efectivos como funcionario de carreira do corpo de mestres e, en último termo, a promoción de ingreso máis antiga e, dentro desta, a maior puntuación que virá dada polo número de lista xeral acreditado por cada concursante.

III. Solicitudes.

Quinta.-Os que desexen participar nesta convocatoria farano da maneira establecida na base décimo cuarta desta convocatoria.

Poderán incluír nas súas peticións calquera posto do centro sendo imprescindible estar habilitado para o seu desempeño.

Á instancia xuntarase, ademais da documentación relacionada no número 1 da norma décimo oitava da base V das normas comúns ás convocatorias, a seguinte:

-Copia do documento que acredita o cesamento en virtude de supresión ou modificación do posto de traballo (só os mestres comprendidos no suposto 1 da norma primeira da base I da convocatoria).

-Copia da resolución de adscrición, anexo III da Orde do 22 de maio de 1990 e, se é o caso, do anexo VI da Orde do 9 de xullo de 1991 ou da Orde do 30 de marzo de 1992 (para os mestres do suposto 2 da dita norma primeira da base I da convocatoria).

Convocatoria segunda de dereito preferente.

Convocatoria para que os mestres que se atopan nalgún dos supostos a que alude o artigo 18 do Real decreto 895/1989, modificado polo Real decreto 2112/1998, do 2 de outubro, poidan exercer o dereito a obter destino nunha localidade ou zona determinada.

Rexeranse polas seguinte bases.

I. Participantes.

Primeira.-Terán dereito preferente, por unha soa vez e con ocasión de vacante, a obter destino nunha localidade determinada, os funcionarios de carreira do corpo de mestres que se atopan nalgún dos supostos que a continuación se indican:

a) Os que, en virtude de resolución administrativa firme, teñan recoñecido o dereito a obter destino

nunha localidade ou recuperalo onde antes o desempeñaban.

b) Os mestres a quen se lles suprimiu o posto de traballo que desempeñaban con carácter definitivo na mesma localidade. Entre os casos de supresión comprenderase o de transformación do posto de traballo cando o titular non reúna os requisitos específicos exixidos nos artigos 6 e 17 do Real decreto 895/1989 para o seu desempeño. Quedan incluídos neste punto os mestres que como consecuencia da adscrición do ano 1996 quedaron adscritos con carácter forzoso a un IES de localidade distinta á de procedencia. Este dereito exercerano exclusivamente á localidade que tiñan acreditada con anterioridade ao proceso de adscrición.

Os mestres que con perda de destino, como consecuencia de permanecer máis dun ano na situación de excedencia por coidado de fillos, exercerán este dereito á localidade do centro no que perderon o posto.

Os mestres adscritos a postos para os que non están habilitados exercerán este dereito á localidade na que prestan os seus servizos.

c) Os mestres de centros públicos españois no estranxeiro que cesaron nestes por transcurso do tempo para o que foron adscritos e a quen o Real decreto 1027/1993, do 25 de xuño, BOE do 6 de agosto, reconece o dereito a ocupar, ao seu retorno a España, un posto de traballo na localidade na que tivesen o seu destino definitivo no momento de producirse o seu nomeamento.

d) Os mestres que, transcorridos os períodos de tres ou seis anos de adscrición á función de inspección educativa, que deban incorporarse ao posto correspondente do seu corpo, e aos que a Lei 23/1988, do 28 de xullo, reconece dereito preferente á localidade do seu último destino definitivo como docente.

e) Os mestres que, con perda da praza docente que desempeñaban con carácter definitivo, pasaron a desempeñar outro posto na Administración, mantendo a súa situación de servizo activo no corpo de mestres, sempre que cesasen neste último posto.

Os mestres que estean recollidos en calquera destas normas deberán exercer este dereito na localidade da que dimana o dereito e poderán exercelo, igualmente, en calquera localidade do ámbito da zona, debendo ter en conta que os adscritos forzosos a un IES, soamente poderán exercelo á localidade do destino que tiñan adxudicado antes do proceso de adscrición de 1996.

Quedan excluídos da participación nesta convocatoria aqueles mestres que con posterioridade á perda do posto de traballo ou ás adscricións de 1990 e 1996 obtiveron outro destino definitivo por calquera dos sistemas de provisión establecidos.

Previamente á resolución do concurso reserváraselles localidade e especialidade tendo en conta a orde de prelación sinalada polos participantes. Para a adxudicación de centro concreto estarán en pé de igualdade co resto de participantes do concurso autonómico.

Segunda.-Serán condicións previas, en todos os supostos anteriores, para exercer o dereito preferente:

a) Que o dereito a destino na localidade ou zona se fundamente en nomeamento realizado directamente para esta, mediante procedemento ordinario de provisión.

b) Que exista posto de traballo vacante ou resulta nas localidades da zona da que se trate, sempre que se estivese lexitimado para o seu desempeño.

Terceira.-Os mestres a que se refire a norma primeira desta base, se desexan facer uso deste dereito preferente, e ata que o alcancen, deberán acudir a todas as convocatorias que, para estes efectos, realicen as administracións públicas, pois, en caso contrario, se consideran decaídos no seu dereito. Todo isto sen prexuízo do que, en relación a estes mestres, se dispón no Real decreto 895/1989.

Os funcionarios do corpo de mestres que estean en situación de suprimidos exercerán este dereito con carácter forzoso á localidade na que estaba situado o seu centro de destino, no suposto de que exista outro ou outros centros nesta localidade, de non ser así, participará á localidade na que ten recoñecido o dereito preferente como consecuencia da escolarización dos alumnos, Orde do 23 de xullo de 1991. Pode participar con carácter voluntario a unha ou a todas as localidades da zona do seu ámbito, podendo, neste suposto, priorizar no punto de peticións estas localidades sobre a que lle acredita o dereito.

Os funcionarios dos corpos de mestres en situación de suprimidos, mentres cumplan coa obriga de participar no concurso de traslados e non transcorran seis convocatorias, a contar desde a convocatoria do 4 de novembro de 2003 (DOG do 13 de novembro), non poderán ser desprazados obrigatoriamente da zona educativa na que se encontraba o centro no que tiñan destino definitivo.

Os funcionarios do corpo de mestres en situación de suprimidos que cumplan coa obriga de participar no concurso de traslados e exerzan o dereito preferente á localidade ou zona educativa na que se encontraba o seu centro, non serán destinados de oficio, podendo permanecer nesta situación indefinidamente.

Cuarta.-Os mestres que aínda permanezan en postos para os que non contan coa preceptiva habilitación, de conformidade coa disposición adicional décima do Real decreto 2112/1998, do 2 de outubro, BOE do 6 de outubro, terán dereito preferente a obter destino na localidade ou zona á que pertence o centro do que son definitivos, sendo incluídos dentro das preferencias establecidas no artigo 18 do Real decreto 895/1989, do 14 de xullo, no grupo B) daquel precepto. Tal dereito exercerano con suxeición ao que se establece nas normas primeira, segunda e terceira desta convocatoria.

En todo caso, deberán exercer este dereito na localidade na que radique o centro no que son definitivos, podendo estender a súa petición a calquera outra ou outras localidades da zona.

Os mestres que fagan uso deste dereito preferente deberán aterse, ao cubrir a súa solicitude, ao previsto na norma sétima desta convocatoria, e a prioridade para facelo efectivo virá dada polo disposto nas normas quinta e sexta, que a continuación se establecen, sendo a puntuación aplicable, segundo baremo, aquela que corresponde á súa condición de propietario definitivo do destino desde o que participa nesta convocatoria.

II. Prioridades.

Quinta.-A prioridade para facer efectivo o dereito preferente a unha localidade ou zona determinada virá dada polo suposto en que se atopen comprendidos, segundo a orde de prelación en que vai relacionado na norma primeira, da base I desta convocatoria.

Cando existan varios mestres dentro dun mesmo grupo, a prioridade entre eles determinarase pola maior puntuación derivada da aplicación do baremo.

Sexta.-Obtida localidade e especialidade como consecuencia do exercicio do dereito preferente, o destino en centro concreto alcanzaran en concurrencia cos participantes no concurso autonómico previsto no artigo 1 da Lei 24/1994, convocatoria que se anuncia co número 3 desta orde, determinándose a súa prioridade de acordo co baremo establecido.

III. Solicitudes.

Sétima.-Os que desexen facer uso do dereito preferente a unha localidade ou zona farano segundo o establecido na base décimo cuarta desta convocatoria.

Nela terán que consignar, no lugar correspondente segundo as instrucións que se xuntan a esta, a localidade ou zona na que solicitan exercer o dereito. Así mesmo, consignarán, por orde de preferencia, todas as especialidades para as que están habilitados. Esta preferencia será tida en conta para efectos de reserva de localidade e especialidade.

Para a obtención de centro concreto deberán relacionar, segundo as súas preferencias, no lugar sinalado para o efecto na instancia, todos os centros da localidade se exercen este dereito na propia localidade. Se exercen voluntariamente dereito preferente á zona deberán consignar na instancia exclusivamente códigos de localidades nas que pretenden obter destino, podendo ser destinado a calquera centro. De non facelo así, e neste supostos concreto e co obxecto de facilitar a recolocación dos suprimidos, o concursante que non o faga será requirido pola Administración para emendar o erro cometido.

Á instancia xuntarase, ademais da documentación relacionada nas normas comúns ás convocatorias:

-Copia do documento que acredite a lexitimación para o exercicio do dereito preferente a unha localidade ou zona determinada.

Convocatoria terceira de concurso de traslados.

Convocatoria do concurso de ámbito autonómico previsto no artigo 1 da Lei 24/1994.

Rexerase polas seguintes bases:

I. Características.

Primeira.-O concurso consistirá na provisión de postos de traballo, por centros e especialidades, dos

previstos no artigo 8 do Real decreto 895/1989 e, se é o caso, cos requisitos lingüísticos que sexan exixibles.

Na resolución de adxudicación indícase a localidade á que corresponden os ditos postos.

II. Participantes.

Segunda.-1. Poderán tomar parte no concurso os funcionarios do corpo de mestres que se atopen en calquera situación administrativa, agás os suspensos mentres permanezan na dita situación.

Os excedentes voluntarios deben reunir as condicións para reingresar ao servizo activo.

2. Os funcionarios do corpo de mestres, propietarios dun posto ou praza que non estea funcionando no actual curso académico 2005-2006, poderán participar no concurso cos mesmos dereitos que os mestres suprimidos, condicionados a que no prazo de reclamacións e renuncias que se establezan na resolución provisional do concurso, teñan recoñecida a condición de suprimidos.

Terceira.-Están obrigados a participar no concurso aqueles mestres que carezan de destino definitivo a consecuencia de:

- 3.1. Resolución firme de expediente disciplinario.
- 3.2. Cumprimento de sentenza ou resolución de recurso.
- 3.3. Supresión do posto de traballo que desempeñaban con carácter definitivo.
- 3.4. Reingreso con destino provisional.
- 3.5. Excedencia forzosa.
- 3.6. Suspensión de funcións, unha vez cumprida a sanción.
- 3.7. Causas análogas que implicasen a perda do posto de traballo que desempeñaban con carácter definitivo.

Cuarta.-Así mesmo, están obrigados a participar neste concurso os provisionais que, estando en servizo activo, nunca obtiveron destino definitivo. Cando as correspondentes convocatorias dos procesos selectivos de ingreso e acceso así o tivesen establecido, os funcionarios de carreira que nunca obtiveron destino definitivo están obrigados a obter o seu primeiro destino definitivo no ámbito territorial polo que accederon ao corpo. En consecuencia, non poderán solicitar destino en centros situados noutras comunidades autónomas.

Quinta.-Os mestres comprendidos nos supostos a que fan referencia os números 3.1, 3.4 da norma terceira e aqueles a que alude a norma cuarta desta base, que non participen no concurso ou que non obteñan destino dos solicitados, serán destinados, de existir vacantes, a un posto da Comunidade Autónoma, sempre que cumpran os requisitos exixibles para o seu desempeño.

Sexta.-Os mestres con destino provisional como consecuencia de cumprimento de sentenza ou resolución de recurso, de supresión do posto de traballo do que eran titulares, ou do transcurso do tempo para o que foran adscritos a postos de traballo docen-

tes españois no estranxeiro ou á función de inspección educativa, de non participar no concurso serán destinados libremente pola Consellería de Educación e Ordenación Universitaria na forma que se sinala na norma anterior.

Sétima.-Os procedentes da situación de excedencia forzosa, no caso de non participar no concurso, serán declarados na situación de excedencia voluntaria prevista no punto 2 do artigo 58 da Lei 4/1988, do 26 de maio, da función pública de Galicia.

Oitava.-Os mestres comprendidos no suposto establecido no número 3.6 da norma terceira desta base, de non participar en concurso serán declarados na situación de excedencia voluntaria por interese particular.

De participar e non alcanzar destino dos solicitados serán destinados de oficio pola Consellería de Educación e Ordenación Universitaria na forma que se expresa anteriormente.

Novena.-En todo caso non procederá a adxudicación de oficio conforme as normas anteriores, cando os mestres obtiveran destino en concursos ou procedementos de provisión a postos non comprendidos no ámbito do Real decreto 895/1989.

Dereito de concorrencia.

Décima.-Enténdese por dereito de concorrencia a posibilidade de que varios mestres con destino definitivo condicionen a súa participación voluntaria no concurso á obtención de destino nun ou varios centros dunha provincia determinada.

Este dereito terá as seguintes peculiaridades:

-Os mestres incluírán nas súas peticións centros ou localidades dunha soa provincia, a mesma para cada grupo de concursantes.

-O número de mestres que poden solicitar como concorrentes será, como máximo, de catro, sendo preciso que cada un dos solicitantes presente instancia por separado.

-A adxudicación de destino a estes mestres realizarase entre os postos de traballo vacantes que serán obxecto de provisión de acordo co establecido no artigo 4 do Real decreto 2112/1998, do 2 de outubro.

De non obter destino desta forma consideraranse desestimadas as solicitudes de todos os mestres dun mesmo grupo de concorrentes.

III. Prioridades.

As prioridades virán dadas pola aplicación do baremo que se inclúe como anexo I a esta orde.

IV. Solicitudes.

Décimo primeira.-Os que voluntaria ou obrigatoriamente participen no concurso, farano segundo o establecido na base décimo cuarta desta convocatoria.

Os mestres a que alude a norma quinta da base II desta convocatoria incluírán necesariamente na súa petición de participación no concurso, no concepto global de provincias, a totalidade das que integran a Comunidade Autónoma. De non facelo así, serán destinados de oficio, segundo a orde alfabética, de existir vacante ou resulta para a que estivesen habi-

litados, respectando, en todo caso, a provincia na que prestan servizos.

Normas comúns ás convocatorias

I. Requisitos específicos para o desempeño de determinados postos.

Primeira.-Ademais dos requisitos indicados en cada unha das convocatorias, para poder solicitar postos de:

Educación infantil.

Idioma estranxeiro: inglés.

Idioma estranxeiro: francés.

Educación física.

Música.

Educación especial: pedagogía terapéutica.

Educación especial: audición e linguaxe.

Educación primaria.

Requírese acreditar estar en posesión dalgún dos requisitos específicos que, para o desempeño destes, sinala o artigo 17 do Real decreto 895/1989, modificado polo Real decreto 1664/1991 e o anexo III da Orde do 8 de maio de 1991, DOG do 24 de maio no referente aos postos de traballo de educación musical e o anexo II da Orde do 15 de maio de 1996, entendéndose como habilitados en educación primaria a totalidade dos concursantes.

De conformidade co establecido no punto 3 da disposición transitoria cuarta da Lei orgánica 1/1990, do 3 de outubro, de ordenación xeral do sistema educativo, as administracións educativas, de acordo coas necesidades derivadas da súa planificación educativa, determinarán as vacantes correspondentes ao primeiro ciclo da educación secundaria obrigatoria que quedan reservadas para a provisión por funcionarios pertencentes ao corpo de mestres que, adscritos con carácter definitivo estean exercendo docencia no dito ciclo ou ingresasen no corpo en virtude de procedementos selectivos correspondentes á oferta de emprego de 1997 ou anteriores. En todo caso, na devandita reserva incluíranse as vacantes correspondentes a centros de educación primaria, sempre que acrediten a habilitación correspondente de acordo coas seguintes equivalencias establecidas na Orde do 15 de maio de 1996.

Mestres con certificación de <u>habilitación en:</u> Ciencias sociais	Áreas do primeiro ciclo de ESO <u>para as que queda habilitado:</u> Ciencias sociais-xeografía e historia
Matemáticas e ciencias	Ciencias da natureza e matemáticas
Filoloxía: lingua castelá	Lingua castelá e literatura
Filoloxía: lingua galega	Lingua e literatura galega
Filoloxía lingua castelá e inglés	Lingua estranxeira: inglés
Filoloxía lingua castelá e francés	Lingua estranxeira: francés

Mestres con certificación de <u>habilitación en:</u> Educación física	Áreas do primeiro ciclo de ESO <u>para as que queda habilitado:</u> Educación física
Educación musical	Música
Educación especial: pedagogía terapéutica	Profesor de apoio á atención de alumnos con necesidades educativas especiais.
Educación especial:	audición e linguaxe
Audición e linguaxe	

Para poder optar a postos de traballo de educación infantil, educación primaria, ciencias sociais-xeografía e historia e da área de ciencias naturais e matemáticas do primeiro ciclo de educación secundaria obrigatoria, requírese, así mesmo, acreditar ter superado o curso de perfeccionamento en lingua galega ou estar en posesión dalgunha das súas validacións, ou telo superado a través de proba libre. Para este únicos efectos, entenderase que reúnen este requisito os que superasen a proba de coñecementos de lingua galega no correspondente procedemento selectivo de ingreso no corpo de mestres.

Este requisito deberá posuírse e xustificarse, de ser posible no prazo de presentación de instancias, ou en último caso no prazo de reclamacións e renuncias que se prevexa na resolución provisional do concurso de traslados.

Os concursantes que obteñan neste concurso posto de traballo, agás nos establecidos no parágrafo anterior, por telo xa como requisito, virán obrigados, no prazo de dous anos contados a partir do 1 de setembro do 2006 a superar, polo menos, o curso de perfeccionamento en lingua galega, agás que acrediten ter superado o dito curso ou estar en posesión dalgunha das súas validacións ou homologacións.

Para tal fin xuntarán á súa solicitude a documentación acreditativa que se sinala.

II. Prioridade entre as convocatorias.

Segunda.-A orde en que van relacionadas as convocatorias implica unha prelación na adxudicación de vacantes e resultas en favor dos participantes en cada unha delas, de tal forma que non pode adxudicarse posto a un mestre que participe nunha das convocatorias, se existe solicitante na anterior con dereito, sen prexuízo no que respecta á adxudicación de posto concreto aos que fagan efectivo o seu dereito preferente a unha localidade ou zona determinada, de ter en conta o que se dispón na norma sexta da base II da correspondente convocatoria. Igual criterio se terá en conta para a prelación de convocatorias cando o concursante o faga por máis dunha.

Terceira.-É compatible a concorrencia simultánea, de asistir dereito, a dúas ou máis convocatorias das recollidas nesta orde, utilizando unha única instancia. As peticións atenderanse coa prelación indicada na norma anterior e, unha vez obtido destino, non se terán en conta as restantes peticións.

III. Prioridades na adxudicación de vacantes e resultas en cada convocatoria.

Cuarta.-Salvo no caso da convocatoria primeira (readscripción no centro) que se resolverá cos criterios que nela se especifican, a orde de prioridade para a adxudicación dos postos de traballo virá dada pola puntuación obtida segundo o baremo que figura no anexo I.

Aos participantes polas modalidades 3, 6 ou 10 do punto 6, unha vez ordenados de maior a menor puntuación, adxudicáraselle, de existir vacante ou resulta, centro de entre os voluntariamente solicitados. De non obter destino dentro destas peticións, terase en conta a priorización de provincias e especialidades, de tal maneira que a adxudicación será segundo a orde en que van priorizadas as provincias. De non obter destino en ningunha das provincias, pola primeira especialidade priorizada, pasará á segunda cos mesmos criterios, e así sucesivamente.

A adxudicación efectuarase de acordo coa orde na que están publicados no anexo II desta orde as zonas, localidades e centros, é dicir, que á maior puntuación adxudicáraselle centro que conte co número de orde máis baixo, respectando en todo caso, a priorización de provincias e especialidades.

Terase en conta para a adxudicación de destino forzoso a orde en que figuran as habilitacións na correspondente certificación. De existir máis dunha certificación terase en conta a data de expedición da certificación, sempre e cando o concursante omita estes datos na letra C da súa solicitude.

Igualmente, de omitir os códigos das provincias que conforman a Comunidade Autónoma de Galicia, consignarase de oficio en primeiro lugar aquela na que presta servizos seguindo despois pola orde alfabética das restantes.

Quinta.-O cómputo dos servizos prestados en centros ou postos singulares clasificados como de especial dificultade por tratarse de difícil desempeño ou de zona de actuación educativa preferente a que se refire a letra b) do baremo, comenará a partir da publicación da clasificación como tales, Orde do 24 de outubro de 1990, DOG do 12 de novembro.

Sexta.-Para os fins de determinar os servizos a que se refiren as letras a) e b) do baremo, e unicamente para efectos do concurso de traslados, considerarase como centro desde o que se participa, para aqueles que acoden sen destino definitivo como comprendidos nos supostos do artigo 11.4º do Real decreto 895/1989, o último servido con carácter definitivo, ao que se acumularán, se é o caso, os prestados provisionalmente con posterioridade en calquera outro centro.

Os que participan desde a situación de provisionalidade por térselles suprimido a unidade ou posto escolar que viñan desempeñando con carácter definitivo, por resultar desprazados por cumprimento de sentenza ou resolución de recurso ou por proceder de excedencia forzosa, terán dereito, ademais, a que

se lle acumulen ao centro de procedencia os servizos prestados con carácter definitivo no centro inmediatamente anterior. Para o caso de mestres afectados por supresións consecutivas de posto de traballo, esa acumulación comprenderá os servizos prestados con carácter definitivo nos centros que sucesivamente lle foron suprimidos.

No suposto de que o mestre afectado non desempeñase outro destino definitivo terá dereito a que se lle acumule, para os efectos sinalados, a puntuación correspondente a letra c) do baremo.

Sétima.-Os mestres que teñen o destino definitivo nun centro por desagregación ou traslado total ou parcial doutro ou transformación, contarán, para os efectos de permanencia ininterrompida prevista na letra a) do artigo 21 do Real decreto 895/1989, a referida ao seu centro de orixe.

Oitava.-Aqueles mestres que participan desde o seu primeiro destino definitivo obtido por concurso ao que tiveron que acudir obrigatoriamente desde a situación de provisionais de novo ingreso, poderán optar a que se lles aplique no lugar da letra a) do baremo, a puntuación correspondente a letra c) del, considerándose, neste caso, como provisionais todos os anos de servizo. De non facer constar este extremo no espazo que para tal fin figura na instancia de participación, considerarase que participan pola epígrafe que lle outorgue maior puntuación.

Para estes efectos considerarase que están no seu primeiro destino definitivo aqueles mestres que no momento de participación no proceso de adscrición regulado pola Orde do 15 de maio de 1996 estaban no seu primeiro destino definitivo aínda que nel resultasen adscritos a outro centro.

Novena.-Os mestres que acudan a esta convocatoria desde o primeiro destino definitivo obtido ao que tiveron que acudir por térselles suprimido o posto do que eran titulares, terán dereito a que se lles considere, unicamente para efectos de concurso, como prestados no centro desde o que concursan os servizos que acrediten no centro no que se lles suprimiu o posto. Este mesmo criterio aplicaráselles aos que se encontren prestando servizos no primeiro destino definitivo despois de perdelo por cumprimento de sentenza, resolución de recurso ou por proceder da situación de excedencia forzosa.

Décima.-Para a valoración dos méritos previstos nos puntos g.1.5. e g.1.6., alegados polos concursantes, constituirase unha ou máis comisións, designadas para o efecto pola secretario xeral, á que poderán asistir un representante das organizacións sindicais acreditadas na mesa sectorial docente non universitaria, con voz e sen voto.

Décimo primeira.-No caso de que se producisen empates no total das puntuacións estes resolveranse atendendo, sucesivamente, á maior puntuación en cada un dos puntos do baremo conforme a orde en que aparecen nel. Se persistise o empate atenderase á puntuación obtida nos distintos subpuntos pola

orde en que aparecen no baremo. De ser necesario utilizarase, como derradeiro criterio de desempate o ano da convocatoria de ingreso e dentro deste a maior puntuación obtida no proceso selectivo.

IV. Vacantes.

Décimo segunda.-As vacantes provisionais do concurso publicaranse antes ou o mesmo día no que se inicia o prazo de solicitudes no *Diario Oficial de Galicia*.

As vacantes definitivas faranse públicas no *Diario Oficial de Galicia*, antes do 1 de maio de 2006, previamente á resolución das mencionadas convocatorias, conforme determina o artigo 7 do Real decreto 895/1989, na súa nova redacción dada polo tamén Real decreto 1664/1991.

As vacantes mencionadas serán incrementadas coas que resulten da resolución de todas as convocatorias previstas nesta orde.

Todas as vacantes a que se fai referencia nesta norma deben corresponder a postos de traballo previstos na planificación escolar do curso 2006/2007.

Para estes efectos, a planificación terá en conta o número de alumnos do primeiro ciclo de ESO que se van escolarizar nos institutos de educación secundaria, o número de profesores que posúen determinadas especialidades así como os suprimidos de diferentes zonas educativas.

Décimo terceira.-Co fin de que os participantes nestas convocatorias poidan realizar as súas peticións, xunto a esta orde publícanse a relación de localidades e centros existentes nas diferentes zonas educativas comprendidas no ámbito de xestión da Comunidade Autónoma de Galicia (anexo II). Para os efectos de concurso de traslados unicamente son válidos os códigos de centro, localidade e zona que constan no dito anexo.

V. Formato e forma de facer a petición.

Décimo cuarta.-A solicitude poderase efectuar a través da internet. En caso de usar a páxina web imprimírase a petición e deberá presentarse no rexistro da Consellería de Educación e Ordenación Universitaria, nas súas delegacións provinciais ou en calquera das dependencias ás que alude o artigo 38 da Lei 30/1992, de réxime xurídico das administracións públicas e do procedemento administrativo común.

Sen prexuízo do establecido anteriormente os mestres que non utilicen a páxina web poderán descargar o modelo no servizo web <http://www.edu.xunta.es/persoal/concursos>, podendo tamén facer a súa solicitude no modelo oficial que estará nas delegacións provinciais presentándose por duplicado orixinal e fotocopia nos lugares antes citados, a fotocopia, unha vez selada, quedará en posesión do concursante.

A instancia dirixirase ao secretario xeral.

Décimo quinta.-O número de peticións que cada participante pode incluír na súa solicitude, conorra por unha ou varias convocatorias, non poderá exceder de 500.

Décimo sexta.-As peticións, coa limitación de número anteriormente sinalada, poderán estenderse á totalidade de especialidades acreditadas e centros, por se, previamente á resolución das convocatorias ou en calquera momento do desenvolvemento delas e dado que se incrementan resultas, se producise a vacante da súa preferencia.

As peticións poderán facerse a centro concreto ou localidade, sendo compatibles ambas as modalidades. Os participantes por dereito preferente se voluntariamente solicitan zona, deberán consignar códigos das localidades da zona, non sendo válidos neste suposto códigos de centro. Nese último caso adjudicárase o primeiro centro da localidade con vacante ou resulta, na mesma orde en que aparecen anunciados no anexo II. Se os postos corresponden a ciencias sociais, xeografía e historia do primeiro ciclo da ESO, no recadro correspondente a vernáculo farase constar esta circunstancia poñendo un X.

Décimo sétima.-Nas instancias relacionaranse, conforme as instrucións unidas a elas, por orde de preferencia, os postos que se solicitan, expresando coa maior claridade os conceptos exactos que no impreso da instancia se consignan.

Calquera dato omitido ou consignado erroneamente polo interesado non poderá ser invocado por este para os efectos de futuras reclamacións, nin considerar por tal motivo lesionados os seus intereses e dereitos.

Unha vez entregada a instancia, por ningún concepto se alterará a petición, nin aínda cando se trate da orde de prelación dos postos solicitados. Exclúense destas normas os participantes de dereito preferente a zona, que poderán ser requiridos, de ser o caso, para as rectificacións a que haxa lugar. Cando os códigos resulten ilexibles, estean incompletos ou non se coloquen no cadro correspondente, considéranse non incluídos na petición, perdendo todo dereito en relación con eles os concursantes.

Décimo oitava.-A instancia irá acompañada de:

1. Copia compulsada da certificación de habilitación expedida polo delegado provincial correspondente. Os que con posterioridade aos prazos sinalados na Orde do 8 de marzo de 1991, DOG do 24 de marzo, sobre habilitación do profesorado, cumpriron algún dos requisitos específicos que para o desempeño de determinados postos exige o artigo 17 do Real decreto 895/1989, se participan en calquera destas convocatorias, poderán acreditar tal circunstancia na forma prevista na norma vixésimo quinta da base VI destas normas comúns ás convocatorias.

2. Documentación acreditativa dos cursos realizados ou impartidos, titulacións académicas distintas ás alegadas para o ingreso no corpo, desempeño

de cargos directivos, servizos en postos de traballo na administración educativa, publicacións, e por último, titulacións de ensinanzas de réxime especial.

No que se refire aos cursos de perfeccionamento ten que constar, inescusablemente, o número de horas de duración do curso ou cursos. Aqueles nos que non se fixese mención de tal circunstancia, non se computarán, agás nos cursos de lingua galega e outros nos que conste a súa duración na convocatoria publicada no *Diario Oficial de Galicia*, que se valorarán conforme a esta, aínda que no certificado non conste a súa duración.

Para que sexan puntuadas as titulacións de primeiro ciclo, será necesario presentar fotocopia do título de diplomado ou, se é o caso, certificación académica persoal na que se faga constar que se cursaron e aprobaron todas as disciplinas correspondentes aos tres primeiros cursos de que consta unha licenciatura, enxeñaría ou arquitectura, non entendéndose como titulación de primeiro ciclo a superación do curso de adaptación.

A presentación da fotocopia compulsada do título de licenciado, enxeñeiro ou arquitecto dará lugar, exclusivamente, ao recoñecemento da puntuación correspondente ao segundo ciclo.

Para a valoración da titulación de segundo ciclo é requisito imprescindible xuntar fotocopia compulsada ou cotexada do título de mestre.

A compulsa de documentos xustificativos de méritos, e calquera outro que o concursante incorpore á súa instancia, poderá efectuarse nos centros de educación infantil/primaria, centros públicos integrados e centros de secundaria, compulsa que asinará o director ou secretario do centro, sen prexuízo de que poida realizarse nos distintos órganos administrativos acreditados para tal fin.

Non será necesario xustificar aqueles méritos recoñecidos pola Consellería de Educación e Ordenación Universitaria na súa proposta de baremo na súa páxina web.

VI. Outras normas.

Décimo novena.-O prazo de presentación de instancias para todas as convocatorias será do 26 de outubro ao 12 de novembro ambos incluídos.

Vixésima.-Todas as condicións que se existen nestas convocatorias e os méritos que aleguen os participantes teranse cumpridos ou recoñecidos na data de terminación do prazo de presentación de solicitudes, excepto o requisito de dous anos de permanencia no destino definitivo desde o que se solicita, que se contabilizarán a 31 de agosto de 2006.

Non obstante, a folla de servizos, para efectos de determinar a puntuación dos concursantes, pecharase o día 16 de novembro de 2005.

Vixésimo primeira.-Non serán tidos en conta os méritos non invocados nas solicitudes, nin tampouco aqueles que non se xustifiquen documentalmente durante o prazo de presentación.

Vixésimo segunda.-Poderá ser anulado o destino obtido por calquera concursante que non se axuste ás normas da convocatoria.

Vixésimo terceira.-É requisito imprescindible en calquera das convocatorias, para solicitar un posto determinado, estar habilitado para o seu desempeño.

Vixésimo cuarta.-Para poder participar neste curso deberá acreditarse permanencia ininterrompida de dous anos no destino definitivo no posto desde o que se participa.

Vixésimo quinta.-A circunstancia de estar en posesión dos requisitos específicos para o desempeño de determinados postos de traballo que exige o artigo 17 do Real decreto 895/1989, na súa nova redacción dada polo Real decreto 1664/1991, acreditarase por medio da certificación de habilitación expedida polo delegado provincial.

Aqueles mestres que con posterioridade á finalización dos prazos previstos na Orde do 8 de maio de 1991, DOG do 24 de maio, superaron cursos de especialización convocados polo Ministerio de Educación e Cultura ou polas comunidades autónomas con competencias en materia de educación e que habilitan para o desempeño de determinados postos, de participar nestas convocatorias, poderán solicitar a habilitación correspondente, xuntando ao resto da documentación a instancia solicitude segundo modelo anexo I da Orde do 8 de maio de 1991, DOG do 24 de maio, e certificado acreditativo de ter superado o curso ou cursos correspondentes, no que conste, a parte dos extremos que se considere necesarios, a área ou especialidade del e a data de convocatoria.

Así mesmo, aqueles mestres que, con posterioridade aos indicados prazos e por teren rematado os estudos correspondentes, estivesen en condicións de obter algún dos títulos ou diplomas que para o desempeño de determinados postos exige o artigo 17 do Real decreto 895/1989 e a nova redacción dada polo Real decreto 1664/1991 e pretendesen facelo valer nestas convocatorias, poderán solicitar a habilitación correspondente, xuntando certificación académica na que se faga constar a finalización dos estudos, que xuntarán ao resto da documentación de participación.

Vixésimo sexta.-Os mestres que concorran ao curso desde a situación de excedencia, no caso de obtiren destino, virán obrigados a presentar na delegación da provincia onde radique o destino obtido e antes da toma de posesión, os documentos que se indican a continuación e que o citado organismo terá que examinar co fin de prestar a súa conformidade e autorizarlos para facerse cargo do destino alcanzado. Os documentos que se presentarán son os seguintes: copia da orde de excedencia e declaración de non ter sido separado mediante expediente disciplinario do servizo da Administración do Estado, institucional ou local, nin estar inhabilitado para o exercicio de funcións públicas.

Aqueles mestres que non logren xustificar os requisitos exixidos para o reingreso, non poderán tomar posesión do destino obtido no concurso, quedando a citada praza como vacante para a súa provisión segundo corresponda.

Vixésimo sétima.-Os que participen nestas convocatorias e soliciten e obteñan a excedencia no transcurso da súa resolución ou cesen no servizo activo por calquera outra causa, consideraranse como cesantes na praza que lles corresponda, quedando esta como vacante para a súa provisión segundo corresponda.

Vixésimo oitava.-Os mestres que obteñan praza nestas convocatorias e durante a súa tramitación permutasen os seus destinos, estarán obrigados a servir o posto para o que foron nomeados, anulándose a permuta que fora concedida.

VII. Tramitación.

Vixésimo novena.-As delegacións provinciais remitirán á secretaría xeral as solicitudes de participación presentadas polos mestres.

Se a solicitude non reunise os datos que sinala o artigo 71 da Lei 30/1992, requirirase o solicitante para que no prazo de 10 días, repare a falta ou xunte os documentos preceptivos, con apercibimento de que, se así non o fixese, se arquivará sen máis trámite.

Exclúense desta norma os datos referidos a códigos de zona, localidade, centro e especialidades que, en ningún caso, poden ser alterados, agás o previsto na base cuarta da convocatoria segunda.

As instancias con aspectos a rectificar serán tramitadas polas delegacións provinciais como as dos demais, facendo constar na cabeceira da petición o defecto que é preciso reparar e a circunstancia do requirimento ao interesado, correspondendo á Secretaría Xeral a medida de archivar, sen máis trámites, as instancias que non se emendaren; para este efecto a respectiva delegación oficiará sobre tal extremo á citada secretaría xeral.

Trixésima.-Con respecto ás peticións daqueles mestres que cumpren algún dos requisitos específicos do artigo 17, con posterioridade á finalización dos prazos previstos na Orde do 8 de maio de 1991, DOG do 24 de maio, as delegacións provinciais constituirán unha comisión coa composición sinalada no punto 81 da dita orde para efectos de analizar a documentación achegada e propoñer, se é o caso, ao delegado provincial, a expedición da oportuna certificación de habilitación. En tal caso darase trámite á petición para o concurso polo que respecta á/s nova/s especialidade/s recoñecida/s.

Trixésimo primeira.-A secretaría xeral, unha vez realizados os trámites oportunos, exporá nos taboleiros de anuncios das delegacións provinciais e da Consellería de Educación e Ordenación Educativa, as seguintes relacións:

a) Relación de participantes na convocatoria de mobilidade dos mestres no centro, ordenados alfa-

beticamente por localidades e dentro de cada unha destas por centros. Os solicitantes de cada centro ordenaranse, así mesmo, polo suposto de participación, considerando conxuntamente os supostos 1 e 2. Nesta relación expresarase a antigüidade do mestre como definitivo no centro, para efectos de concurso, os anos de servizo como funcionario de carreira, ano de ingreso no corpo e número de lista.

b) Relación dos participantes na convocatoria para o exercicio do dereito preferente, ordenados por grupos segundo a prioridade sinalada na norma primeira, en concordancia coa quinta, da base da dita convocatoria. Nesta relación farase mención expresa da puntuación que segundo o baremo corresponde a cada un dos participantes.

c) Relación dos participantes no concurso, punto 6, con expresión da puntuación que lles corresponde por cada un dos puntos e subpuntos do baremo.

d) Relación, de ser o caso, de peticións que foron rexeitadas.

A secretaría xeral dará un prazo de dez días naturais para reclamacións.

Trixésimo segunda.-Rematado o citado prazo, a secretaría xeral exporá no taboleiro de anuncios as rectificacións que procedan.

Contra esta exposición non cabe reclamación e terá que esperarse a que a secretaría xeral faga pública no *Diario Oficial de Galicia* a resolución provisional das convocatorias e estableza o correspondente prazo de reclamacións.

Trixésimo terceira.-As delegacións provinciais remitirán relación dos mestres que, estando obrigados a participar no concurso, non o fixesen. Destes mestres formularán impreso de solicitude para cada un, consignando todos os datos que se sinalan para os que presentaron solicitude, sen consignar peticións na letra b) da instancia e cubrindo a letra c) dela priorizando a provincia na que está destinado e seguindo coa orde alfabética das restantes, empezando pola primeira. Igualmente cubrirán o espazo de especialidades priorizándoas tal e como constan na correspondente certificación de habilitación.

VIII. Adxudicación de destinos e toma de posesión.

Trixésimo cuarta.-A secretaría xeral resolverá cantas dúbidas se susciten no cumprimento do que por estas convocatorias se dispón: adxudicará provisoriamente os destinos, concederá prazo para reclamacións e desistencias e, por último, elevaranse a definitivos os nomeamentos, resolvéndose aqueles pola mesma resolución que será obxecto de publicación no *Diario Oficial de Galicia*, e pola que se entenderán notificados, para todos os efectos, os concursantes aos que aquelas afecten. Contra esta resolución poderá interpoñerse recurso de alzada ante o conselleiro de Educación e Ordenación Universitaria no prazo dun mes contado desde a súa publicación.

Trixésimo quinta.-A desistencia á participación no concurso deberá formularse nos prazos establecidos para tal fin na resolución provisional, entendéndose este como baixa total na/s convocatoria/s de participación.

Trixésimo sexta.-Os destinos adxudicados na resolución definitiva son irrenunciáveis.

Trixésimo sétima.-A toma de posesión do novo destino terá lugar o día 1 de setembro de 2006, cesando no de procedencia o último día de agosto do mesmo ano.

Non obstante, os mestres que estean impartindo o primeiro ciclo de educación secundaria obrigatoria e obtivesen destino neste concurso deberán permanecer nos seus centros de orixe realizando as acti-

vidades imprescindibles previstas para a finalización do curso, é dicir, os exames e avaliación de setembro.

IX.-Recursos.

Trixésimo oitava.-Contra esta orde poderá interpoñerse recurso contencioso-administrativo nos prazos e forma establecidos na Lei reguladora da xurisdición contencioso-administrativa.

X. Entrada en vigor.

Esta orde entrará en vigor o mesmo día da súa publicación.

Santiago de Compostela, 11 de outubro de 2005.

Laura Sánchez Piñón
Conselleira de Educación e Ordenación
Universitaria